

Na osnovu čl. 2. i 3. Zakona o mjerama za unapređenje stočarstva ("Službene novine Federacije BiH", broj 23/98) i člana 67. stav 2. Zakona o organizaciji organa uprave u Federaciji Bosne i Hercegovine ("Službene novine Federacije BiH", broj 25/05) ministar privrede donosi

PRAVILNIK

O MJERAMA ZA UNAPREĐENJE STOČARSKE PROIZVODNJE NA PODRUČJU KANTONA SARAJEVO

I. OPĆE ODREDBE

Član 1. (Predmet)

Ovim Pravilnikom propisuju se zoohigijenske i zootehničke mjere držanja stoke, područja na kojima je dozvoljeno držanje stoke i područja na kojima je zabranjeno držanje stoke, razvrstana po općinama, na području Kantona Sarajevo (u daljnjem tekstu: Kanton).

II. POJMOVI

Član 2. (Pojmovi)

Pojmovi upotrijebljeni u ovom Pravilniku imaju slijedeća značenja:

- 1) stoka su: goveda, konji, ovce, koze, svinje, pernata živina, kunići i pčele;
- 2) zoohigijenske mjere su uslovi smještaja i držanja stoke;
- 3) zootehničke mjere su sistem tehnološko-tehničkih postupaka u uzgoju i iskorištavanju stoke;
- 4) oplodavanje stoke je zootehnička i zdravstvena mjera koja se vrši vještačkim osjemenjavanjem ili prirodnim pripustom - parenjem;
- 5) licenciranje je uzgojna mjera odabira i ocjene priplodnjaka za prirodni pripust;
- 6) selekcija je postupak i mjera kojom se izgrađuje vrijedna i u populaciji natprosječna životinja;
- 7) pčelinjak je skup košnica s pčelama koje su smještene na slobodnom prostoru, odnosno u posebnoj stabilnoj ili montažnoj kućici, a može biti ugrađen u vozilo za prevoz;
- 8) pojedinac je fizičko neregistrovano lice.

III. PRIMJENA ZOOHIGIJENSKIH I ZOOTEHNIČKIH MJERA ZA DRŽANJE STOKE

Član 3. (Držanje stoke u skladu sa propisima)

Držanje i iskorištavanje stoke u privredne svrhe obavezno se vrši u skladu sa propisima o zoohigijenskim i zootehničkim uslovima, dobrobiti životinja i zaštiti okoliša.

Član 4. (Objekti za smještaj stoke)

- (1) Objekti za smještaj stoke obavezno se grade tako da stoci pruže optimalne uslove za život primjenjujući zoohigijenske i zootehničke mjere u kojim će doći do izražaja njihovi maksimalni proizvodni potencijali.
- (2) Na pravilan uzgoj i proizvodne mogućnosti stoke u objektu utiču: temperatura, vlaga, podna podloga, mikro klima, svjetlost, oprema i uređaji.
- (3) Objekti za smještaj krupne stoke (goveda, konja, magaraca, mazgi i mula) obavezno su visine 2,80 m i da obezbjeđuju po grlu na vezu za 1,8 - 2,8 m² površine ležišta u zavisnosti od pasmine i težine navedenih grla, a za konje u boksu dimenziju boksa 3 X 3 m².

- (4) Objekti za smještaj sitne stoke (ovaca, koza, svinja) obavezno su visine 2,50 m i da obezbjeđuju 1,2 - 2 m² površine po grlu.
- (5) Objekti ili prostorije i kavezi za držanje peradi i kunića obavezno su izgrađeni od tvrdog materijala i da obezbjeđe minimalno na 1m² površinu prostora za 6 - 12 kom purana u ovisnosti od starosti i težine purana, odnosno za 15 do 17 kom kokoši u ovisnosti od težine kokosa i za 6-12 komada kunića u ovisnosti od vrste i težine kunića.
- (6) Pernata živina i kunići mogu se držati u objektima, kavezima i na otvorenom prostoru.
- (7) Pernata živina i kunići mogu se držati i na otvorenom prostoru pod uslovima da je isti ograđen tako da se spriječava nekontrolisan izlazak peradi i kunića i da je uređen tako da se može održavati redovna higijena.
- (8) Podovi, zidovi i krov objekata za smještaj stoke treba da budu adekvatno izolovani od djelovanja negativnih klimatskih uticaja.
- (9) Svi objekti za smještaj stoke treba da obezbjeđe dovoljno svjetlosti koja utiče na fiziološke funkcije stoke i na mikroklimu stoke tako da na 10-15 m² poda treba obezbjeđiti 1 m² prozora.
- (10) Objekti za smještaj stoke treba da posjeduju ventilacione otvore koji su dimenzija 0,35- 0,60 m ili druge otvore (vrata, prozori) putem kojih će stoka dobiti potrebne količine svježeg zraka.
- (11) U svim objektima za držanje stoke držaoci stoke su dužni osigurati higijenski ispravnu vodu.

Član 5.

Objekti za smještaj stoke obavezno se redovno čiste i dezinfikuju dezinfekcionim sredstvima.

Član 6.

(Đubrovnik)

- (1) Uz objekat za smještaj stoke ili u neposrednoj blizini istog, obavezno se nalazi i đubrovnik izgrađen od vodonepropusnog materijala.
- (2) Đubrovnik se obavezno gradi tako da spriječi kontaminaciju okoline, isti se nakon punjenja mora prazniti da ne bi došlo do izlivanja.
- (3) Objekti za smještaj stoke obavezno imaju sistem za prihvat i odvođenje otpadnih i padavinskih voda koje se ulijevaju u kanalizaciju ili prirodni recipijent bez prečišćavanja.

Član 7.

(Prečišćavanje otpadnih i fekalnih voda)

Otpadne i fekalne vode iz objekata prije ulijevanja u kanalizaciju ili prirodni recipijent obavezno prolaze kroz odgovarajući sistem prečišćavanja.

Član 8.

(Udaljenost objekata za smještaj stoke)

Objekti za smještaj stoke obavezno su udaljeni od stambenog prostora najmanje 20 m, a od izvora, bunara i drugih tekućih voda 40 m.

1. Oplođavanje stoke

Član 9. (Oplođavanje stoke)

Oplođavanje stoke je zootehnička i zdravstvena mjera koja se vrši vještačkim osjemenjavanjem ili prirodnim pripustom - parenjem.

Član 10. (Vještačko osjemenjavanje)

- (1) Za vještačko osjemenjavanje upotrebljava se samo sjeme priplodnih grla koja su ispitana na potomstvo (progeni test).
- (2) Vještačko osjemenjavanje priplodnih grla (krava i junica) vrši se na svim općinama u Kantonu.

Član 11. (Prirodni pripust)

- (1) Ukoliko su na nekom području rezultati vještačkog osjemenjavanja duži vremenski period loši (puno jalovih grla) ministarstvo može propisati da se na tom području može vršiti prirodna oplodnja nakon što se izvrši licenciranje grla određene pasmine koja je zastupljena na tom području.
- (2) Licenciranje priplodnjaka obavezno vrši komisija koju imenuje resorni ministar rješenjem.

Član 12. (Uzgojno selekcijske mjere)

U cilju povećanja proizvodnih, reproduktivnih, zdravstvenih i drugih osobina stoke provode se uzgojno selekcijske mjere.

2. Stočna smotra

Član 13. (Stočna smotra)

- (1) Na području Kantona organizuje se stočna smotra (sajam).
- (2) Stočna smotra je manifestacija koja se održava u cilju unaprijeđenja stočarstva, ocjenjivanjem pojedinačnih uspjeha u uzgojnim programima pojedinih vrsta stoke i pasmina, a sa statusom lokalnog, entitetskog ili međunarodnog značaja.

Član 14. (Stočna aukcija)

Stočna aukcija je manifestacija, koja je prodajno-izložbenog karaktera.

3. Držanje pčela

Član 15. (Držalac pčela)

Vlasnici ili držaoci pčela dužni su se pridržavati mjera propisanih ovim pravilnikom, radi unaprijeđenja pčelarstva, te zdravstvene i druge zaštite pčela.

Član 16.
(Postavljanje pčelinjaka)

Vlasnici ili držaoci pčela dužni su postaviti pčelinjak tako da ne smeta susjedima, prolaznicima, stoci, javnom saobraćaju i drugim licima.

Član 17.
(Isticanje ploče na pčelinjaku)

Na pčelinjaku se obavezno ističe ploča, sa upisanim imenom i prezimenom te mjestom prebivališta držaoca pčelinjaka i brojem nastanjenih košnica u pčelinjaku.

Član 18.
(Premještanje pčela)

Radi ispaše pčela držalac pčela može samo zdrave pčele premjestiti sa jednog mjesta na drugo.

Član 19.
(Transport pčela)

Za transport pčela obavezno se koriste zatvorene košnice koje su osigurane od pomjeranja i ispadanja, tako da u toku transporta ne može doći do otvaranja košnica ili gušenja pčela.

IV. PODRUČJA NA KOJIMA JE ZABRANJENO DRŽANJE STOKE I PODRUČJA NA KOJIMA JE DOZVOLJENO DRŽANJE STOKE

Područja općina

Član 20.
(Općina Stari Grad)

(1) Na području općine Stari Grad Sarajevo **zabranjeno je** držanje stoke na sljedećim lokalitetima: a) Području mjesnih zajednica: "Bašćaršija", "Ferhadija", "Kovači", "Mjedenica", "Logavina", "Medrese", "Babića bašća", "Bistrik", "Vratnik", i "Sumbuluša" te u užoj zaštitnoj zoni planinskih izvorišta vode za piće sarajevskog vodovodnog sistema: "Moščanica", "Crnil" i "Sedrenik", izuzev pernate živine i kunića i to na području koje je ograničeno sljedećim ulicama: Čadordžina do raskršća ulice Logavina, ulicom Logavina do raskršća Ispod Budakovića, ulicom Ispod Budakovića do raskršća sa ulicom Medrese, ulicom Medrese do raskršća sa ulicom Safvet-bega Bašagića, ulicom Kiseljačka do raskršća sa ulicom Nova mahala, ulicom Nova mahala do raskršća sa ulicom Sumbul česma, ulicom Sumbul česma do raskršća sa ulicom Strošići, ulicom Strošići do ulice Prijeka česma, ulicom Prijeka česma do raskršća sa ulicom Mačkareva, ulicom Mačkareva do ulice Ćebadžije donje, ulicom Ćebadžije donje do ulice Carina, ulicom Poddžebhanom do ulice Mustajbega Ličkog do raskršća ulice Ispod grada, vazdušnom linijom do Miljacke a zatim vazdušnom linijom na raskršću ulice Hošin brijeg, Podcarina i Alije Bejtića, Ulicom Hošin brijeg do raskršća sa ulicom Kačanik mali, Ulicom Kačanik mali do raskršća sa ulicom Nalina, Pod Hridom i ulicom Iza hrida, ulicom Iza hrida do ulice Huremuša, ulicom Huremuša do ulice Bistrik (Bistrički most), od Bistričkog mosta ulicom Pastrma, ulicom Hamida Dizdara, ulicom Goloderica do raskršća ulice Za beglukom i Hambina carina i ide ulicom Cicin han do granice sa općinom Centar. U ulicama koje su navedene kao granične **zabranjeno je** držanje stoke.

(2) Na području mjesne zajednice "Sedrenik" **dozvoljeno je** držanje stoke iznad ulice Sedrenik, a držanje kunića i pernate živine između ulica Sedrenik i linije opisane u tački a) ovog člana.

(3) Na području mjesnih zajednica "Hrid" - Jarčedoli, "Mahmutovac", "Toka Džeka" i "Širokača" **dozvoljeno je** držanje stoke iznad granica opisanih u stavu (1) ovog člana.

(4) Na području mjesne zajednice "Moščanica" **dozvoljeno je** držanje stoke.

Član 21.
(Općina Centar)

Na području općine Centar Sarajevo **zabranjeno je** držanje stoke i pernate živine osim:

- a) na području mjesnih zajednica: "Pionirska dolina -Nahorevo" (na mjesnom području Pionirska dolina samo u ulicama Radava i Debelj); "Hrastovi - Mrkovići" (izuzev na mjesnom području Hrastovi); "Šip - Betanija" (izuzev mjesnog područja Šip i zona obuhvaćenim Regulacionim planom Gradski park "Betanija", "Univerzitetski medicinski centar" i "Zelena transferzala").
- b) na području mjesnih zajednica "Pionirska dolina - Nahorevo" (na mjesnom području Pionirska dolina samo u ulicama Radava, Debelj, iznad ulice Svetozara Čorovića i Aleksandra Puškina); Hrastovi - Mrkovići (na mjesnom području Hrastovi samo iznad ulice Grdonj i u ulici Panjina Kula od broja 147); "Šip - Betanija"(izuzev mjesnog područja Šip i zona obuhvaćenim Regulacionim planom Gradski park Betanija"); ("Univerzitetski medicinski centar" i "Zelena transferzala) i Soukbunar (samo iznad ulice Porodice Foht) **dozvoljeno je držanje samo pernate živine.**

Član 22.
(Općina Novo Sarajevo)

(1) Na području općine Novo Sarajevo **zabranjeno je** držanje stoke na područjima mjesnih zajednica:

- a) "Željeznička" "Trg Heroja", "Hrasno", "Čengić Vila 1", "Čengić Vila 2", "Malta", "Grbavica 1", "Grbavica 2", "Kvadrant", "Dolac", "Gornji Kovačići" (izuzev dijela ulice Ohridska - rejon Debelog brda), "Hrasno brdo" (izuzev lijeve - gornje strane ulice Novopazarska, te ulice: 10. maja, Dolina mira, ulice Kanara i Mahmuta Mahmutovića do granice sa Općinom Novi Grad)", "Pofalići 2"(Ispod granične linije), "Pofalići 1", (ispod granične linije), "Donji Velešići" (ispod granične linije) i "Gornji Velešići" (ispod granične linije).

- b) Granična linija kojom se odvajaju područja zabrane držanja stoke od dozvoljenih područja za držanje stoke za mjesne zajednice "Pofalići 1", "Pofalići 2", "Donji Velešići" i "Gornji Velešići"je sljedeća: Dozvoljeno je držanje stoke na lijevoj strani od granične linije koja počinje od granice sa općinom Novi Grad, Buča Potok od preduzeća "Zrak" pravcem preko pravoslavnog groblja od dalekovodnog stuba (na parceli k.č. 2466/01 K.O. Novo Sarajevo I) ulijevo pravcem od kuće Zahira Panjete broj 280, zatim ide lijevom stranom ulice Zahira Panjete od broja 280 do 240, od broja Zahira Panjete 240 skreće ulijevo i ide lijevom stranom ulice do broja 204, od broja Zahira Panjete 204 skreće desno i ide pravcem do broja Zahira Panjete 160, od broja Zahira Panjete 160 skreće lijevo i ide pravcem do raskršća ulicom Humsko Brdo i Humska do broja 342, od broja Humska 343 ide lijevom stranom pravcem do broja 373 i skreće ulijevo idući do kraja Humska 385, skreće udesno i ide lijevom stranom ulice Humska ispod rezervoara u Gornjim Pofalićima preko broja 443 i 447 do raskršća sa ulicom Reisa Fehima Spahe broj 163, skreće udesno i spušta se pravcem do broja Čikma Reisa Fehima Spahe do broja 96 (starog rezervoara) skreće ulijevo i spušta se pravcem do broja Čikma Reisa Fehima Spahe 163 te ide pravcem na gornju ogradu strelišta (parcela k.č. 932 K.O. Novo Sarajevo I), od ograde strelišta ide vazdušnom linijom od ulice Velešići 136, od broja Velešići 136 ide pravcem na dalekovodni stub (parcela K.O. 810 K.O. Novo Sarajevo I), skreće ulijevo i ide lijevom stranom ulice Gornji Velešići (uz ulicu) do raskršća do broja Gornji Velešići 281 (sa gornje strane raskršća ide preko raskršća 100 metara naprijed do broja Gornji Velešići 98 skreće udesno i spušta se pravcem preko broja Gornji Velešići 66 do broja ulice Mehmeda Efendije Pandže 275, skreće ulijevo i ide pravcem preko starog vojnog rezervoara (k.č. 179 K.O. Novo Sarajevo I) do granice sa općinom Centar.

(2) **Zabranjeno je** držanje stoke u zaštitnim zonama: Pofalići I - zona klizišta, Pofalići-Velešići potez Mljekara-Grand hotel, Mehorića voćnjak, Pofalići-Velešići zona iznad strelišta i zona spomen-parka "Vraca".

Član 23.
(Općina Novi Grad)

(1) Na području općine Novi Grad **zabranjeno je** držanje stoke:

U urbanom dijelu unutar linije razgraničenja, koja počinje od nadvožnjaka u Buča Potoku, ide desnom stranom ulice Safeta Zajke do mjesta gdje se ulica Safeta Zajke uključuje na magistralni put Sarajevo - Zenica,

vraća se magistralnim putem do Bačića, ide iza Bačića i "Centrotransa", ulazi i ide paralelno sa granicom sa općinom Ilidža i međuentitetskom linijom do mjesta gdje sječe ulicu Želimira Vidovića - Kelija, ide vazdušnom linijom na zapad prema brdu Mojnilo, zaobilazi naselje Turkušići ulazi u Novopazarsku ulicu, spušta se Novopazarskom ulicom na zapad i ulazi u ulicu Vejsila Čurčića, skreće lijevo i spušta se ulicom Sulejmana Pačariza Hodže do ulice Safeta Hadžića, skreće desno i ide desnom stranom ulice Safeta Hadžića na sjever prema općini Novo Sarajevo do granice sa općinom i dalje nastavlja granicom do nadvožnjaka u Buča Potoku.

(2) Na području općine Novi Grad **dozvoljeno je** držanje stoke:

a) U pojasu sa desne strane u pravcu sjever- sjeverozapad do granice sa općinama Novo Sarajevo, odnosno Vogošća, od granične linije koja počinje od preduzeća "Zrak" i ide ulicom Adema Buće na sjeverozapad prema Gradskoj deponiji smeća do motela "Eki" gdje se na raskršću sa ulicom Rafaela Gaona spušta desnom stranom ulice do Rafaela Gaona broj 40, silazi u pravcu zapada vazdušnom linijom i siječe ulicu Dolačka na broju 99, diže se vazdušnom linijom prema ulici Esada Midžića na broju 135 te prema sjeverozapadu izlazi na ulicu Irfana Ljubjankića kod broja 21., vraća se ulicom na raskrscnicu ulica Bratunačka i Esada Midžića, spušta se desnom stranom ulice Grada Bobovca i ulice Derviša Fevze Mostarca, prolazi ispod kuće na broju 18 vlasništvo Hote Vahida te ide na zapad vazdušnom linijom preko kuće na broju Derviš Fevze Mostarca 28, ide ulicom Derviš Fevze Mostarca do broja 47, nastavlja u pravcu zapada i sječe ulicu Smaje Šikala na broju 281, ide desnom stranom ulice Smaje Šikala do broja 261 i produžava u pravcu zapada na ulicu Mustafe Muje Pašića i prolazi ispod kuće na broju 48, nastavlja na udaljenosti od cca 50 m paralelno od izgrađenih individualnih objekata prema kapiji Gradske deponije, od kapije Gradske deponije ide na zapad vazdušnom linijom prema Briješću do raskrsnice - okretaljke autobuske linije Otoka-Buča Potok i ulazi u ulicu Briješće Brdo zahvatajući pojas paralelno sa ulicom sa lijeve strane u širini od cca 300 m sve do džamije u Briješću, od džamije linija ide desnom stranom ulice Briješće Brdo i ulazi u ulicu Numan Paše Čuprilića sve do raskrsnice sa ulicom Zaima Imamovića, ide desnom stranom ulice Zaima Imamovića do broja 76, od broja 76 kreće prema Zabrdi i ide dalje ulicom Zaima Imamovića do broja 61, od broja 61 ide vazdušnom linijom u pravcu zapada i siječe magistralni put Sarajevo-Zenica na mjestu gdje se odvaja put za Reljevo.

b) Od skretanja za Reljevo u pojasu sa desne strane južno i jugoistočno od granične linije prema općini Ilijaš odnosno Ilidži, koja ide lijevom stranom ceste prema Reljevu do "Jugopetrola" skreće iza "Jugopetrola" na istok, ide putem te siječe bivšu industrijsku prugu (nasip), ide nasipom prema Butilama i izlazi na rijeku Bosnu, ulazi u korito rijeke Bosne i vraća se uzvodno od ušća Miljacke u Bosnu, ide koritom Miljacke te granicom općine Novi Grad i Ilidža kao i Novo Sarajevo.

c) Na brdu Mojnilo u naselju Turkušići, kao i u pojasu (istočno) iza ulice Novopazarska od broja 234 prema međuentitetskoj liniji i graniči sa općinom Novo Sarajevo do Milinkladske ulice.

Član 24.

(Općina Ilidža)

(1) Na području općine Ilidža **zabranjeno je** držanje stoke na slijedećim lokalitetima:

a) U naseljima: Stup, Ilidža, Sokolovići, Bare, Stojčevac, Vreoca, Vrutci, Bačevo, Vrelo Bosne, Konaci, Plandište i urbanizirani dijelovi Butmira i Otesa.

Pored navedenih naselja granica područja zabrane držanja stoke počinje od lijeve obale rijeke Miljacke, na mjestu gdje je granica Općine Ilidža i Općine Novi Grad do mjesta gdje je željezna ograda novog aerodroma izlazi na stari put Sarajevo - Trnovo. Od ove tačke granica ide u pravcu juga obuhvatajući novi aerodrom, izostavljajući naseljeno mjesto Donji Kotorac i naselje Butmir, ide granicom novog aerodroma prema zapadu do upravne zgrade "Butmir" d.o.o. Sarajevo gdje izlazi na Butmirsku cestu i ide u pravcu rijeke Željeznice, do ušća rijeke Tilave u rijeku Željeznicu. Od ovog mjesta granica ide uzvodno rijekom Željeznicom do 300 m iznad bivše industrijske pruge, skreće u pravcu jugozapada (obuhvatajući naselje Sokolovići) i izlazi na Hrasničku cestu iznad vrtlarije. Od ove tačke granica nastavlja Hrasničkom cestom prema Ilidži do raskršća sa poljskim putem iznad zabavnog parka. Od ovog raskršća granica ide u pravcu jugozapada poljskim putem koji vodi, u naselje Bare, obuhvata naselje Bare, prelazi preko riječice Večerice (izostavljajući naselje Glavogodina i Lipe) bivšom granicom naselja Glavogodina - Stojčevac do podnožja Igmana. Od ove tačke granica ide u pravcu sjeverozapada po izohipsi 550 m nv do iznad objekta "Elektro-prenosa" na Vrelu Bosne, obuhvata te objekte,

silazi na cestu Sarajevo - Mostar, koju presjeca i ide u pravcu željezničke pruge Sarajevo - Ploče granicom naseljenih mjesta Sarajevo - Blažuj do mjesta zvanog "Slana bara". Od ove tačke granica ide željezničkom prugom prema Sarajevu do željezničkog mosta na rijeci Željeznici, zatim nizvodno rijekom Željeznicom do sjeverne granice urbanog dijela naselja Otes, obuhvatajući urbani dio granicom urbanizacije i ponovo izlazi na željezničku prugu Ploče -Sarajevo. Od ove tačke granica ide željezničkom prugom u pravcu Sarajeva do mosta na rijeci Miljacki, zatim nizvodno rijekom Miljackom do polazne tačke.

b) U naseljenom mjestu Hrasnica granica područja zabrane držanja stoke počinje od raskršća Hrasničke ceste i ulica Igmanskih bataljona, Put Famosa (kod stare škole) ide ulicom Igmanskih bataljona, nastavlja ulicom Sabita Užičanina, produžava ka ulici Stari Drum obuhvatajući skladište Ogrev, prelazi preko ulice Stari Drum do rijeke Večericice, uzvodno rijekom Večericom do ušća potoka Ruževik, ide uzvodno potokom Ruževik te ispod groblja na Pandurici izlazi na put koji vodi ispod mejdana (pored Starog mlina) prema rijeci Večericica, uzvodno rijekom Večericica do ušća potoka Bunica, zatim uzvodno potokom Bunica do iznad doma "Partizan", i stadiona "Famos", gdje izlazi na ulicu Šehitluci, ide ovom ulicom do Lasičke ceste i istom produžava do ulice Put Famosa i ide ulicom Put Famosa do polazne tačke.

c) U naseljenom mjestu Blažuj zona zabrane počinje od nadvožnjaka u Blažuju, ide željezničkom prugom u pravcu Ploča do industrijske pruge za nekadašnju tvornicu drvenih ploča "Bosanka", ide ovom prugom do mosta na rijeci Zujevina, zatim nizvodno rijekom Zujevini, obuhvatajući objekte privrednog društva "Šumaprodukt" izlazi na polaznu tačku na nadvožnjak.

2) Na svim ostalim područjima općine Ilidža **dozvoljeno je** držanje stoke.

Član 25.
(Općina Vogošća)

(1) Na području općine Vogošća **zabranjeno je** držanje stoke na sljedećim lokalitetima: Ulice Igmanska, Jošanička, Vogošćanskih odreda, Feriza Merzuka, Remzije Veje, Branilaca Vijenca, Braće Kršo, Izeta Delića, Akifa Ef. Biserovića, Spasoja Blagovčanina, Skendera Kulenovića, Partizanskog Odreda Zvijezda, Tome Mendesa, Omladinska, Safeta Krupica, te mjesne zajednice: Semizovac (ul. Nova Cesta do prvog mosta i stara cesta do Nebočaja), Kobilja Glava (uz Magistralni put Sarajevo Vogošća od autobuske stanice Gornji Hotonj), (naselje Nizovi od BI do B 13), Kobilja Glava (uz Magistralni put Sarajevo Vogošća od autobuske stanice Gornji Hotonj do table Kobilja Glava, na okuci kod auto servisa).

(2) Na svim ostalim područjima općine Vogošća **dozvoljeno je** držanje stoke.

Član 26.
(Općina Ilijaš)

(1) Na području općine Ilijaš, **zabranjeno je** držanje stoke na sljedećim lokalitetima:

a) U urbanom dijelu Ilijaša sadašnje "MZ Ilijaš Grad", MZ "Ilijaš Stari", MZ "Luka, MZ "Srednje" i zaštićeni pejzaž "Bijambare"

b) Urbani dio Ilijaša /sadašnje MZ "Ilijaš Grad", MZ Ilijaš Stari i MZ "Luka"/ u sljedećim granicama: Granica počinje od ušća potoka Gnionice u rijeku Bosnu i ide uzvodno potokom Gnionica do zaštitnog pojasa gasovoda i nastavlja granicom zaštitnog pojasa gasovoda prema regulacionom planu Savića brda, obuhvatom parcela opisanih u R.P. Savića brdo i R.P. Alića Gaj do kraja ulice Hašima Spahića (put za Karašnicu), odakle produžava prema Ulici Bogumilska broj 42, produžava tom ulicom obuhvatajući obje strane, dalje ide iznad ulice 28. juli, produžava u pravcu kuće vlasništvo Mirsada Prohe, i na oko 50 m prije njegove kuće skreće u pravcu juga do mosta na rijeci Misoči (regionalni put Sarajevo - Kakanj) odakle nastavlja tim putem do mosta na rijeci Bosni prema Malešićima, odatle nastavlja desnom obalom rijeke Bosne do zaštitnog pojasa auto - puta Sarajevo - Zenica, dalje produžava desnom stranom zaštitnog pojasa auto - puta do mosta na rijeci Bosni u naselju Luka, odakle nastavlja desnom stranom obale rijeke Bosne do ušća potoka Gnionice u Bosnu, gdje se završava.

c) Na području MZ Srednje (naseljeno mjesto Srednje) granica polazi od benzinske pumpe "INA" i ide magistralnim putem prema Sarajevu do pilane u Srednjem, gdje prelazi rječicu i ide do stare željezničke pruge

(sada makadamski put) i tim putem ide uzvodno 20 m sa lijeve strane puta uzvodno starom prugom, a sada makadamskim putem do naspram benzinske pumpe, prelazi riječicu i ide do benzinske pumpe, gdje se završava.

d) Zaštićeni pejzaž "Bijambare" u granicama utvrđenim Zakonom o proglašenju zaštićenog pejzaža "Bijambare" ("Službene novine Kantona Sarajevo", broj 21/03).

(2) Na području općine Ilijaš dozvoljeno je držanje stoke na sljedećim lokalitetima: MZ "Lješevo" (Lješevo i Odžak), MZ "Ljubinići"(Ljubinići, Balibegovići, Čifluk i Banjer), MZ "Podlugovi" (Podlugovi i Sovrle), MZ "Mrakovo" (Mrakovo, Salkanov Han i Popovići), MZ "Ilijaš Grad" (Kadarići Karašnica), MZ "Luka" (Gornja Luka i Donja Luka sa lijeve strane auto-puta Sarajevo - Zenica, Donja Bioča, Gornja Bioča i Ribarići), MZ "Malešići" (Malešići), MZ "Ilijaš Stari" (Karaula, Karaula Donja, Hadžići i Vlaškovo), MZ Misoča (Gornja Misoča, Donja Misoča i Mlini), MZ "Srednje" (Bokšići, Borak, Donji Čevljanovići, Duševine, Homar, Gojanovići, Han Šići, Hodžići, Ivančići Gornji, Klek, Krivojevići, Lađevići, Medojevići, Moševići, Srednje, Stomorine, Stupe, Šabanci, Velike Šume, Vilići, Visojevica i Zlotege), MZ "Dragoradi" (Dragoradi, Četojevići, Gajine, Podlipnik, Sudići i Vladajevi), MZ "Gajevi" (Gajevi Donje Selo, Draževići, Gornji Čevljanovići, Lipnik rakova Noga, Vrutci i Vukasovići), MZ "Kamenica" (Buljetovina, Hadžići, Kamenica i Krčevina), MZ Ljubina (Čemernica, Čemerno, Han Karaula, Karačići, Kopašići, Korita, Korita Donja, Kožlje, Ljubina, Solakovići, Taračin Do, Tisovik, Ulištovići, Velika Njiva, Vidotina i Višnjica)."

Član 27.
(Općina Hadžići)

(1) Na području općine Hadžići **zabranjeno je** držanje stoke na sljedećim lokalitetima:

a) U Hadžićima granica počinje u ulici Hadželi kod broja 15, skreće u pravcu sjeverozapada ogradom preduzeća "Ingrap" u korito Zujevine i koritom ide do mosta u ulici Anđelka Blažetića. Sa mosta skreće i obilazi kompleks Doma zdravlja, izlazi na ulicu Anđelka Blažetića i ulicom ide do raskrsnice sa Omladinskom ulicom. Od raskrsnice ide Omladinskom ulicom do broja 2 pa ogradom fudbalskog stadiona, sportske dvorane srednjoškolskog centra i osnovne škole. Kod osnovne škole ulazi u korito rijeke Zujevine i koritom ide uzvodno do željezničkog mosta za Remontni zavod gdje izlazi iz korita rijeke Zujevine pored "Papir servisa" ide na jugoistok do željezničke pruge Sarajevo -Ploče. Prugom ide u pravcu Sarajeva do broja 28 u ulici Tihonovska i tom ulicom do broja 1. Tu skreće u pravcu istoka u ulicu Žunovačka kod broja 40 i tim dijelom ulice ide do trafostanice ili broja 52. Iz ulice Žunovačka preko mosta skreće na istok u Igmansku ulicu i ide na sjever Igmanskom ulicom pored brojeva 119,120, 30 i 28. Kod broja 28 Igmanske ulice skreće na sjeveroistok i izlazi na Igmansku ulicu kod broja 32, Igmanskom ulicom ide u pravcu sjeverozapada do broja 15, gdje sa Igmanske ulice pored broja 137 ide na sjever, prelazi željezničku prugu Sarajevo - Ploče, dolazi u ulicu Hadželi i tom ulicom ide do broja 15 od koga je granica i krenula.

b) U Pazariću - granica polazi od broja 20 u ulici Bjelašničkoj sa sjeverne strane na udaljenosti od 20 m i ide paralelno sa ulicom Bjelašničkom na zapad do broja 50 gdje skreće u korito rijeke Zujevine. Koritom rijeke Zujevine ide uzvodno do broja 10 u Željezničkoj ulici, na sjever do broja 24 u istoj ulici, a onda skreće do broja 24 u istoj ulici, a zatim skreće na istok Omladinskom ulicom do broja 8. gdje skreće na sjever do željezničke pruge Sarajevo-Ploče, ide prugom u pravcu Mostara do broja 52. u Željezničkoj ulici. Od broja 52 Željezničke ulice granica ide na jug paralelno sa Željezničkom ulicom do broja 13, ulazi u korito rijeke Resnik, ide uzvodno iza stambene zgrade na broju 70 u Bjelašničkoj ulici. Pored doma kulture sa zapadne strane ide na jug do korita potoka Kradenika kod broja 78, od broja 78 uzvodno koritom potoka Kradenik granica ide sa sjeverne strane Bjelašničke ulice do broja 108 koji se nalazi na raskršću ulica Bjelašnička i Radnička. Tu granica ide na jug u ulicu Novo naselje do broja 1., od broja 1. skreće na istok paralelno sa Bjelašničkom ulicom sa južne strane na udaljenosti od 20 m. ide do broja 53 a onda ogradom oko osnovne škole "9 maj" Pazarić, prelazi u ulicu "9 maj " i do ambulante na broju 31. Od ambulante paralelno sa južnom stranom ulice Bjelašničke na udaljenosti od 20 m granica ide na istok do potoka Jedrinje i potokom do broja 20 Bjelašničke ulice gdje se završava.

c) U Tarčinu - granica polazi na raskrsnici ulica IX Brdske brigade i ulice Mrđana Đoke i ide paralelno sa zapadnom stranom ulice Mrđana Đoke, na udaljenosti od 20 m do Tuheljske ulice, gdje ide na jug preko ulice Mrđana Đoke, iza ambulante naselja zvanog Žegrap i međom kompleksa osnovne škole do puta za Korču. Putem za Korču ide na sjever do ulice Mrđana Đoke, tu skreće na istok paralelno sa južnom stranom ulice Mrđana Đoke do puta za Japalake, kojim ide do kraja kompleksa Silosa i oko njega se vraća na sjever paralelno sa istočnom stranom puta za Japalake do ulice Mrđana Đoke, odakle ide paralelno sa južnom a potom istočnom stranom ulice Mrđana Đoke na udaljenosti od 20 m do ulice IX Brdske brigade gdje se završava.

(2) Na ostalim područjima općine Hadžići **dozvoljeno je** držanje stoke.

Član 28.
(Općina Trnovo)

Na području općine Trnovo **zabranjeno je** držanje stoke:

- a) unutar ograđenih zemljišnih površina na kojima su objekti kulturno - historijsko - vjerskog sadržaja i naučno - nastavno - odgojnog sadržaja;
- b) kod uređaja i opreme za prenos i distribuciju električne energije;
- c) kod uređaja i opreme za proizvodnju - sakupljanje - distribuciju vode za piće;
- d) kod objekata sportskog ili rekreativnog sadržaja, te drugih objekata javne namjene;
- e) uz magistralne i regionalne cestovne komunikacije,
- f) uz objekte hotelskog - pansionskog ili sličnog tipa i uz prateći sadržaj istih za smještaj posjetilaca.

Član 29.

Na području Kantona na lokalitetima na kojima je dozvoljeno držanje stoke zabranjeno je ispuštanje stoke po ulicama, uz željezničke pruge, parkove i spomen obilježja.

Član 30.

Na područjima Kantona na lokalitetima na kojima je dozvoljeno samo držanje pernate živine i kunića maksimalno je dozvoljeno držati do 30 kom. jedne od navedenih vrsta.

Član 31.

(1) Držanje stoke zabranjeno je u vodozaštitnim zonama i zaštićenim prirodnim područjima utvrđenih zakonskim i podzakonskim propisima iz te oblasti i "Odlukom o usvajanju prostornog plana Kantona Sarajevo za period 2003-2023. godine" ("Službene novine Kantona Sarajevo", broj 26/06).

(2) Ukoliko područja na kojima je dozvoljeno držanje stoke utvrđena ovim Pravilnikom budu u koliziji sa propisima i odlukom iz stava (1) ovog člana primjenjivat će se propisi i Odluka iz stava (1) ovog člana.

V. NADZOR

Član 32.
(Nadzor)

Nadzor nad primjenom ovog Pravilnika vrše: poljoprivredna, veterinarska, komunalna i vodna inspekcija svaka iz svoje nadležnosti.

Član 33.

Za pravno, fizičko registrovana lice i pojedinca koji postupi protivno odredbama ovog Pravilnika primjenjivat će se odredbe člana 35. stav 1. i 3. člana 36 stav 4. i član 37. Zakona o mjerama za unapređenje stočarstva ("Službene novine Federacije BiH", broj 23/98).

VI. ZAVRŠNE ODREDBE

Član 34.
(Stavljanje akta van snage)

Stupanjem na snagu ovog Pravilnika prestaje da važi Pravilnik o mjerama za unapređenje stočarske proizvodnje na području Kantona Sarajevo ("Službene novine Kantona Sarajevo", broj 18/00, 3/01 i 3/03).

Član 35.
(Stupanje na snagu)

Ovaj Pravilnik stupa na snagu osmog dana od dana objavljivanja u "Službenim novinama Kantona Sarajevo".

Broj 07-05-24-10983
14. jula 2010. godine
Sarajevo

Ministar
Mr. **Abid Šarić**, s. r.